



Senin, 05 Desember 2022

Ogen: Daniel 9:1-19



"Dibata Si Melias"



Sada kalimat simpepalem pusuh dingén erbahanca teneng ukur sekalak tupung ia erbahan kejahatanén e me “kualemi salahndu dingén lanai kam kuhukum.” Ertina adi lit sekalak erbahan kejahatanén dingén tereteh ia erbahan dosa, si iperlukenna e me lit kalak si banci dengan ngaloken ia.

Bangsa Israel e me bangsa si megati kel nilah arah undang-undang Dibata, bangsa si ipemersikna ukurna dingén bangsa si mekung. Kinilapatuhenna erbahansa ia ibuang ku Mesir seh maka i nanamina kiniseran si mesangat. Kiniseran si inanami bangsa e iidah Dibata janah Ia ngerana erkelang-kelangken nabiNa e me Daniel. Ate Dibata arah Daniel mpeseh sura-suraNa lako maba mulihi bangsa Israel kempak dalam si payo dingén ngikutken undang-undang Dibata. ayat 3-4 “E maka ertoto aku alu tutus man Tuhan Dibata, mindo man BaNa alu mengisngis, erpuasa, make uis guni, janah kundul i bas abu. Ertoto aku man Tuhan Dibatangku dingén kukataken dosa-dosa bangsangku. Ningku, O Tuhan Kam kap Dibata si mbelin, e maka ipehaga kami Kam. Kam tetap i bas PadanNdu janah kekelengenNdu la mobah man kalak si erkeleng ate man BaNdu janah ngelakoken kai si IperentahkenNdu.” Tindakken rikut pe ras pertoton si ipenangkih Daniel ncidahken gelahna min bangsa Israel banci mulihken kempak sura-sura Dibata. Dibata Bapa tetap mereken dingén nehken keleng ateNa man bangsaNa. Dibata si sembah bangsa Israel ras pe siisembah kita seh asa gundari eme Dibata Bapa si Melias. Dibata nehken keleng ateNa alu ngalemi dosa bangsaNa.

Kita me gundari bangsa Israel i bas jaman enda, si kin kita pe megati nilah arah undang-undang dingén pedah Dibata, si megati lan dalanken sura-sura Dibata. Kekelengen Dibata la pernah nadingken kita erkiteken Dibata e perkuah dingén melias. E maka tetapliah kita nggeluh alu setia kempak Dibata Bapa si Melias.

“Keleng ateKU kam, erkiteken AKU Melias”